

Dierweyl denn dieses gegenwertig Kindlein / in  
seiner Natur / mit gleicher Sünde / inn massen wie  
Wir auch / vergiffet vnd verunreiniget ist / dar-  
umb es auch des Ewigen Todes / vnd Verdam-  
nuß / sein vnd bleiben müste. Vnd aber Gott der  
Vater aller Genaden vnd Barmhertzigkeyt / seinen  
Sohn Christum der ganzen Welt / vnd also auch  
den Kindlein nicht weniger / denn den Alten verhei-  
sen / vnd gesandt hat / Welcher auch der ganzen  
Welt Sünde getragen / vnd die armen Kindlein  
gleich so wol / als die Alten / von Sündt / Todt / vnd  
Verdamnus / Erlöset / vnd selig gemacht hat / vnd  
befohlen / man sol sie zu Ihm bringen / das sie ge-  
segnet werden.

Derhalben so Vermane / vnd Bitte ich euch  
Alle / die ihr alhie versamlet seid / auß Christlicher  
Liebe vnd Trewe / das ihr ernstlich zu Hertzzen ne-  
men / vnd mit fleiß bedencen wolt / in was grossen  
Jammer vnd Noth diß Kindlein / seiner Art vnd  
Natur halben / stecket / Nemlich das es sey ein Kind  
der Sünden / des Zorns / vnd Ungenad / vnd das  
ihm nicht anders geholffen werden möge / denn das  
es durch die Tauffe auß Gott Newgeboren / vnd  
von Gott an eines Kindes stat / vonn wegen vnser  
Herrn Jesu Christi angenommen werde.

Stankisman